



Broj: 04-05-4-2499/18

Sarajevo, 24.12.2018. godine

SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA

„PRAĆENJE REALIZACIJE PREPORUKA IZ IZVJEŠTAJA REVIZIJE UČINKA:

UNAPREĐENJE ENERGETSKE EFIKASNOSTI U INSTITUCIJAMA FBIH,,

Ured za reviziju institucija u Federaciji Bosne i Hercegovine proveo je praćenje realizacije preporuka iz Izvještaja revizije učinka „Unapređenje energetske efikasnosti u institucijama FBIH“, objavljenog 2015. godine. Cilj praćenja bio je ispitati preduzete aktivnosti institucija na temelju predmetnog izvještaja i procijeniti u kojoj mjeri su date preporuke realizovane.

Na osnovu provedenog praćenja utvrđeno je da su nadležne institucije u FBIH u proteklom periodu preduzele aktivnosti na realizaciji preporuka iz predmetnog izvještaja, ali da većina preporuka i dalje nije u potpunosti realizovana. Od ukupno trinaest datih preporuka, tri preporuke su realizovane, pet preporuka je djelimično realizovano, dok za četiri preporuke institucije još uvijek nisu preduzele potrebne aktivnosti na njihovoj realizaciji. Jedna od datih preporuka više nije relevantna obzirom da je podzakonski akt na koji se preporuka odnosila stavljen van snage.

U proteklom periodu ostvaren je značajan napredak u osiguranju osnovnih pretpostavki za sistemsko unapređenje energetske efikasnosti u FBIH, međutim i dalje su potrebne značajne aktivnosti kako bi se ostvarilo stvarno unapređenje u predmetnoj oblasti. Iako je donesen Zakon o energijskoj efikasnosti u FBIH, te su izrađene Okvirna energetska strategija FBIH do 2035. godine i Akcioni plan energetske efikasnosti FBIH za period 2016.-2018. godina, još uvijek nedostaju važni podzakonski akti koji su neophodni za postupanje u skladu sa odredbama Zakona o energijskoj efikasnosti u FBIH i za realizaciju programa unapređenja energetske efikasnosti. Donesenim Zakonom, strateškim i planskim dokumentima propisane su obaveze javnog sektora u pogledu unapređenja energetske efikasnosti, međutim, utvrđeno je da institucije FBIH u proteklom periodu nisu planirale i realizovale konkretne mjere kako bi smanjile potrošnju energije i ostvarile ostale koristi od unapređenja energetske efikasnosti.

Provedeno praćenje je također pokazalo da Parlament FBIH i Vlada FBIH nisu razmatrali predmetni izvještaj revizije učinka, kako bi svojim zaključcima dodatno obavezali institucije na postupanje u skladu sa datim preporukama. Pored navedenog, utvrđeno je da Vlada FBIH nije posebno analizirala preporuke koje su joj bile upućene, niti je planirala način realizovanja preporuka iz predmetnog izvještaja.

Ured za reviziju cijeni da nadležne institucije trebaju uložiti dodatne napore kako bi realizovale preporuke date u izvještaju „Unapređenje energetske efikasnosti u institucijama FBIH“, te posebnu pažnju posvetiti unapređenju energetske efikasnosti u javnom sektoru. U uslovima ograničenih resursa, pitanje ekonomičnog i efikasnog trošenja energije, te smanjenje izdataka za energiju od izuzetne je važnosti. Pored navedenog, unapređenjem energetske efikasnosti smanjuju se negativne posljedice na okoliš, stvaraju nova radna mjesta, osigurava ekonomski rast i održivi razvoj.

Kompletan izvještaj revizije učinka dostupan je na web stranici Ureda za reviziju: www.vrifbih.ba.

GENERALNI REVIZOR

Dževad Nekić, dipl. oec.

